

文山集

文山集

宋丞相文山先生全集卷之十六



附錄

文丞相傳

吉水胡廣撰

宋文丞相天祥字宋瑞一字履善吉州廬陵人也父儀號
革齋鄉稱長者大父時用夢兒乘紫雲下已復上而天祥
生故名雲孫字天祥英姿雋爽目光如電稍長游鄉校見
學宮祠鄉先生歐陽文忠公楊忠襄公胡忠簡公周文忠
公像慨然曰沒不俎豆其間非夫也寶祐乙卯年二十舉
進士對策集英殿時理宗在位久政理浸怠天祥以法天
不息爲對其言萬餘不爲藁一揮而成寘第五帝親擢爲

第一考官王應麟奏曰是卷古誼若龜鑑忠肝如鐵石臣敢爲得人賀尋丁父憂歸服除授承事郎僉書寧海軍節度判官廳公事開慶初元師圍鄂江上有警左相吳潛倡遷幸議內都知董宋臣實主之天祥上書乞斬董宋臣以謝宗廟神靈以解中外怨怒并條陳數事一曰簡文法以立事二曰倣方鎮以建守三曰就團結以抽兵四曰破資格以用人辭旨剴切幾萬餘言書奏不報自免歸以前職改鎮南軍不拜乞祠得主管建昌軍仙都觀除祕書省正字兼景獻府教授充殿試考官進校書郎著作郎兼權刑部郎官董宋臣復入爲內都知又上書極言其惡請寘之

罪亦不報出守瑞州召爲禮部郎官尋除江西提刑伯祖
母梁夫人卒夫人其父本生母也即日解官而臺臣黃萬
石論以不職終喪除尚書左司郎中尋兼權直學士院兼
國史院編修官實錄院檢討官臺臣黃鏞奏免除福建提
刑臺臣陳懋欽復奏寢新命改知寧國府以郡居上流僻
塞稅務無所取辦爲民害奏罷之別取郡計以補課額民
歌舞之爲立生祠除軍器監兼右司尋兼崇政殿說書兼
權直學士院兼玉牒所檢討官賈似道稱疾乞致仕以要
君有詔不允學士院降詔裁責以義天祥當制時內制相
承必先呈藁於相天祥不逆似道意諷別直院改作天祥

援楊大年故事亟求解職似道勉留力丐祠東擔出國門
遷秘書監似道使臺臣張志立劾罷之除湖南運判臺臣
陳堅復奏寢天祥既數斥援錢若水例致仕時年三十七
始闢文山於其鄉窮山水之樂咸淳九年起爲湖南提刑
平邵永巨寇道路肅清見故相江萬里於長沙萬里素奇
天祥志節語及國事愀然曰吾老矣觀天時人事當有變
吾閱人多矣世道之責其在君乎君其勉之是冬乞便郡
養親十年改知贛州明年爲德祐元年乙亥元至元十二
年也正月朔牒報元師渡江詔諸路勤王天祥捧詔涕泣
使陳繼周發郡中豪傑并結溪洞蠻使方興召吉州兵諸

豪傑皆應有衆萬人事聞除右文殿修撰樞密副都承旨
江西安撫副使兼知贛州尋兼江西提刑進集英殿修撰
江西安撫使加權兵部侍郎丁祖母劉夫人憂葬夫人而
起復命下累疏乞終制不許乃趣兵移洪初左相王燾主
天祥遷擢屢趣天祥入衛與右相陳宜中不合燾引嫌去
國京學生上書訟宜中沮天祥事宜中出關留夢炎代相
素厚宜中又黨江西制置黃萬石至是夢炎奏趣萬石入
衛以天祥移屯隆興經略九江萬石陰與呂師夔通自隆
興退屯置司撫州嗾守臣趙必岳以宜黃令趙時秘狀稱
寧都連謝吳唐明戴六家義士劫樂安宜黃將至撫州申

樞密院天祥言寧都六姓招募數千人駐吉州候旨入衛
未嘗有一足至撫州境內守臣張皇誑惑欲沮撓勤王大
計有旨責降必出時秘趣天祥入衛其友止之曰今元軍
薄郊畿君以新集之兵赴之是何異驅群羊搏猛虎天祥
曰吾豈不知第國家養育臣庶三百餘年一旦有急徵天
下兵無一人一騎入關者吾深恨於此故不自量力而以
身殉之庶天下忠臣義士將有聞風而起者義勝者謀立
人衆者功濟如此則社稷可保也天祥盡以家貲爲軍費
每與賓佐語及時事輒流涕撫几言曰樂人之樂者憂人
之憂食人之食者死人之事八月天祥提兵二萬至衡州

除權工部尚書兼都督府叅贊軍事至臨安朝論猶以宜
中未入爲嫌天祥駐兵西湖兩月累奏乞終喪又奏古有
墨衰從戎無墨衰登要津者乞仍以樞密副都承旨江西
安撫副使領兵國門皆不許除浙西江東制置使兼江西
安撫大使兼知平江府留不遣俟宜中至乃發朝議以呂
師孟爲兵部尚書封呂文德和義郡王欲賴以求好師孟
益偃蹇自肆天祥上疏言朝廷姑息牽制之意多奮發剛
斷之義少乞斬師孟釁鼓以作將士之氣不報常州已急
始遣天祥就戍尋除端明殿學士十月天祥入平江宜中
遣使張全將淮兵二千援常州天祥遣其將朱華尹玉麻

士龍將廣贛兵三千從之張全以兵伏虞橋士龍戰死而全不援走回五牧以就朱華華措置守禦全不許元兵薄華軍華戰敗績張全擁軍隔河不發一矢華軍渡水者爭挽全軍船全令軍斷其指華軍多溺死元兵繞山後薄贛軍曾今等先遁張全亦宵遁尹王獨以孤軍當其鋒人皆殊死戰所殺人馬無筭王死之及明得脫者四人無一人降者天祥欲斬張全請於督府督府竟宥之獨斬曾全以徇奏贈尹王團練使立廟死所官其二子元師破常州屠其城進攻獨松關急留夢炎陳宜中陳文龍議棄平江趣天祥移守餘杭天祥猶豫未決兩府劄再至乃委印通判

王舉之責環衛王邦傑以城守天祥去平江三日舉之邦
傑開門迎降都人大駭議天祥棄平江天祥出兩府劄榜
朝天門衆始定進資政殿學士浙西江東制置大使兼江
西安撫大使置屯餘杭守獨松關未幾留夢炎遁明年正
月除知臨安府不拜以輕兵赴闕始從天祥初議送吉王
信王閩廣大臣日請三宮渡江太皇太后不允都人競爲
危言持車駕不欲動天祥請以福王或沂王判臨安以繫
人望身爲少尹以輔之有急密移三宮當以死衛社稷議
不合少保張世傑宿重兵六和塔天祥又請將京師義士
二十萬與城內外軍數萬人隸少保背城借一以戰爲守

世傑不許十八日元丞相伯顏至臯亭山距臨安三十里
宜中遣使絡繹講解伯顏邀宜中相見宜中許之而遁明
日世傑亦遁除天祥樞密使又除右丞相兼樞密使不拜
使者至上下震恐莫知所爲有旨今天祥詣軍前講解遂
以資政殿學士行因說伯顏曰宋承帝王正統非遼金比
今北朝將欲以爲與國乎將欲毀其宗社乎若以爲與國
則宜退兵平江或嘉興然後議歲幣金帛犒師天祥躬督
所議輸軍前北朝全師以還此不戰而全勝策之上也若
欲毀其宗社則兩淮兩浙閩廣尚多未下窮兵取之利鈍
未可知假能盡取豪傑並起兵連禍結必自此始伯顏以

危言折之天祥謂宋狀元宰相所欠一死報國耳宋存與
存宋亡與亡刀鋸在前鼎鑊在後非所懼也何怖我爲伯
顏爲之改容因留大祥且曰前日已遣程鵬飛詣宋太皇
太后簾前親聽處分候鵬飛至即與丞相定議明日左丞
相吳堅右丞相賈餘慶同知樞密使謝堂僉書樞密院事
家鉉翁同僉書樞密院事劉岳與呂師孟奉降表至伯顏
引天祥同坐堅等各就車歸獨留天祥不遣天祥大罵賈
餘慶等賣國且責伯顏失信呂文煥從傍慰解之初天祥
上疏乞斬呂師孟斥言叛逆遺孽當用春秋誅亂賊法至
是文煥謂天祥何故以逆賊見罵天祥曰國家不幸至今

文山全集 卷之十六
日汝爲罪魁非逆賊而何三尺童子猶斥罵汝獨我乎文
煥曰守襄陽六年不救是以至此天祥曰呂氏一門父子
兄弟受國厚恩不幸勢窮援絕以死報國可也豈有降理
汝自愛身惜妻子壞家聲今汝闔族爲逆矣尚何言文煥
慚恚師孟忿怒云丞相今日何不殺師孟天祥謂汝叔姪
賣降恨朝廷失刑不族滅汝汝今日能殺我我得爲大宋
忠臣足矣豈懼死哉師孟語塞伯顏聞之吐舌云男子男
子自是愈益留不遣賈餘慶歸令學士院詔天下歸附放
還天祥所部勤王義士其渡浙歸闡者惟方興朱華鄒鳳
張朴數人耳二月八日伯顏趣天祥隨吳堅賈餘慶北行

初天祥將詣軍前諸客皆贊行天台杜許獨留行諸客逐
許去至是諸客皆散惟許從至京口留十日天祥欲引決
許與帳前余元慶定計亡趨真州舟不可得元慶遇故舊
以白金千兩求之其人云吾爲大宋脫一丞相事成豈止
白金千兩哉強委不受竟得舟二十九日午趣過瓜州天
祥辭以明日同吳丞相渡江得軀迫稍緩是夕醉主人沈
氏與守者王千戶得出門又從沈氏先識巡夜者杜許強
與之飲而宿之酒樓得其官燈出巷至舟幾爲邏舟所獲
賴潮退彼膠淺適風便幸脫至真州城下三月朔日也守
將苗再成延入城時真州不聞京師消息已數月忽天祥

至無不感憤流涕再成與諸將幕皆謂兩淮兵力足以興復恨李制置與淮西夏宣撫不能合從得丞相交通兩閩不一月間連兵大舉江南可傳檄定也天祥問再成計將安出再成言灣頭楊子橋守者皆沿江脆兵今以通泰軍攻灣頭以高郵寶應淮安軍攻楊子橋以揚州兵向瓜州再成與刺史趙孟綿以舟師直擣鎮江同日大舉彼勢不能相救復以灣頭楊子橋兵三面合攻瓜州再成自江中一面薄之雖有智者不能爲之謀矣然後以淮東軍入京口淮西軍入金陵要兩浙歸路其大帥可坐致也天祥喜甚卽爲書李庭芝夏貴遣使四出約結先是揚州有脫歸

卒言密遣一丞相入真州說降矣庭芝得書反疑宰相併
十二人無得脫理以天祥來說降罪真州開門納之諭再
成遂亟殺天祥以自白再成不忍殺給天祥出視城壕使
王陸二都統導之出城示以制司文書天祥方驚嘆兩都
統即鞭馬入城門已閉矣天祥徬徨門外久之杜許欲赴
城壕死有張徐二路分自言苗安撫遣送丞相惟丞相所
向天祥云今惟往揚州路分云安撫謂揚州不可往天祥
云夏宣撫不相識淮西又無歸路委命於天惟往揚州久
之有弓刀五十人至張徐各就騎以二騎從天祥天祥與
杜許連騎行數里張徐請下馬天祥既下又云且行既行